

Do 2018. godine planiramo investirati 10 mil EUR u tehnološki razvoj i očuvanje okoliša, što će svakako doprinijeti i novim zapošljavanjima. "Fabrika cementa Lukavac" je i društveno odgovoran član lokalne zajednice i kroz razne projekte podržavamo sve segmente društva, jer želimo poboljšati kvalitet života u našem gradu, najavio je Izet Imamović, direktor "Fabrike cementa Lukavac".

Osim što je postala ekološki industrijski primjer, FCL je u proteklih 15 godina dao izuzetan doprinos privrednom razvoju Lukavca, ali i cijele tuzlanske regije. U proizvodnji cementa koriste se isključivo domaće sirovine, a direktno je zaposleno više od 200 radnika.

- FCL je već godinama među najpoželjnijim poslodavcima. Trudimo se da imamo zdrav odnos prema svojim uposlenicima u čije usavršavanje konstatno ulažemo. U prošloj godini uposlili smo 12 novih radnika, od čega šest visokoobrazovanih - naglasio je Imamović. Također, lukavačka cementara prva je u BiH počela koristiti alternativna goriva od otpada visoke kalorične vrijednosti nastalog iz domaćinstava, industrije i drugih djelatnosti što doprinosi očuvanju neobnovljivih izvora energije, smanjenju troškova proizvodnje za industriju, te očuvanju okoline kroz trajno rješavanje otpada.

FCL je jedna je od rijetkih uspješnih priča o privatizaciji u Bosni i Hercegovini i upravo zahvaljujući prelasku u vlasništvo austrijske kompanije "Asamer Baustoffe", fabrika je postala najveći proizvođač cementa u našoj zemlji.

- Ove godine brojnim aktivnostima planiramo obilježiti 15 godina od uspješne privatizacije. Izuzetno smo ponosni što smo dio ugledne poslovne grupacije "Asamer" koja je donijela značajnu investiciju u BiH. Od privatizacije 2001. godine fabrika je prošla dvije velike faze izgradnje i rekonstrukcije u koje je investirano više od 200 mil KM. Zahvaljujući tome, FCL je od jedne tehnološki zastarjele fabrike postala među najmodernijim i ekološki najprihvatljivijim cementarama u Evropi. Napori koje je grupacija "Asamer" uložila u ekologiju doprinijeli su da Lukavac i njegova okolina sada dišu čistiji zrak - kazao je Imamović.

izvor: ekapija.com